



兩東唱和錄

坤

和
656
2





兩東唱和錄卷之下

○奉呈南泛叟長生失職然泉管原隆吉

新開賓館迓皇華殊域風光忽覺佳豈只文章驚海
內也知名姓滿天涯管原隆吉

○奉次管原投示韻南泛叟

浪萃從古說繁華秋晚風光更絕佳信義山川非我
土暮天歸思海東涯信義山川非我

○恭呈東郭李先生案下伏祈行政

醉蓮居井融謹具

貴邦文物舊嘗聞，豈料即今親見君。不惜瓊瑤報桃李，頭看椽筆起烟雲。

僕姓井名融，字昭明，號恕軒。有別莊，開小池，植荷花數種，中有千葉者，花色大紅，形如芍藥。種自天竺國來也。扁以醉蓮居，雖不敢效昔賢高致，希顏之志，未嘗不少在也。伏冀明公特垂寵賜，運健筆書醉蓮居三大字，且獲領佳作一篇，則誠使弊居生光輝，終身之幸也。

○奉次恕軒詞伯

東郭

玉井蓮花已飽聞，一池佳景屬吾君。亭々萬柄清香

動愛看朱華爛彩雲

○東郭公辱賜高和，又用前韻奉謝

博祭

恕軒

高裁清韻更堪聞，菊發園籬似待君。客館秋深光艷爽，只嗟他日隔江雲。

○次奉恕軒謝惠椒

東郭

披箋却喜暗香聞，瓊餽慙慙更荷君。怡悵此行何日返，鴈聲淒斷海天雲。

○奉呈李東郭洪鏡湖嚴龍湖南泛叟四君吟壇下伏祈郢政

恕軒

九秋韓客遠方來。岩菊溪楓喜色開。幾首新詩存古韻。方知碩德又多才。

○奉次醉蓮詞伯韻

東郭

縹緲雲端曙色來。寺門催向大江開。詩仙秀句鏗金玉。認是天東拔萃才。

○和贈醉蓮店主人韻

鏡湖

仙萼應從玉井來。吾行恨不趁花開。壁間欲寫瀛漢趣。愧謝天然太白才。

○奉次醉蓮惠韻

泛叟

清晨客子袖詩來。旅榻逢迎一笑開。聞道君家池榭

好欲題堂壁。愧無才

○奉次醉蓮示韻

龍湖

多謝詞人訪我來。一床談笑好懷開。詩工筆妙兼雙絕。知是靖州拔萃才。

○再疊前韻贈恕軒詞伯

龍湖

西竺名花自遠來。一區粧點小塘開。多君獨得漁翁趣。欲寫新詩愧不才。

○融問姓名書曰

僕姓嚴名漢重字子鼎。號龍湖。叅進士及第。歷職秘書省博士。高敞郡太守。今以副使書記來。

○東郭鏡湖龍湖泛叟四君辱賜高和復次前韻
奉謝 博笑 恕軒

四箇名家再世來，佳篇清如菊花開。
半譚韓國半和國，觀感堂頭教育才。

○遙次醉蓮詞伯寄示韻 東郭

麗藻翻驚寄我來，客懷還似對君開。
它時文室相逢處，欲賦荷花奈不才。

清詩遙寄病夫來，珍重琅函手自開。
最感新知多厚義，不徒詞翰有奇才。

消息初隨驛使來，好詩能使病懷開。
誰知銀浦乘槎

客素乏梁園授簡才

留別江城我獨來，客間懷抱苦難開。
新詩一唱仍三

歎，君似晁監有逸才。

別君旬月始歸來，一閉禪門不復開。
忽奉佳篇如對

面，浪吟聊復賞雄才。

彩箋遙帶好音來，月露能教病眼開。
托契君休忘好

意，賞音吾亦愛多才。

旅館前宵大雨來，海天新霽冷雲開。
何當再向尊前

會，更試吾君七步才。

竹籟蕭々枕上來，一樽誰向燭前開。
虛名有力能駢

策老大慚無翰墨才

海上羣山走勢來武都城郭倚天開
聯翩每與詩仙會斑岳清標謝眺才

詩仙良朋自遠來襟懷快得一時開
重逢會向樽前醉不必區々較小才

交踈則情踈交密則情密乃人之常也
足下與僕不過數宵接冷談閑話而乃能致書遠問非有出
久高義曷能如是哉茲敢十疊高韻以道願言之
誠辛卯孟冬

○謹奉稟李東郭洪鏡湖嚴龍湖南泛叟案下

曩日啓鄙居有醉蓮之号仍承致天空千葉蓮子
之命緘封以獻左右此物隨君子旋歸永滋蔓貴
國區々愛蓮之意深以為喜也僕晚學固陋幸遂
披雲之願慰幸之極未易言叙臨別悵然恭裁
詞以浼高覽伏祈郵斤 恕軒

贈君蓮子趣還寄要着朱藻照綠池他日青錢浮水

上臨風千里更相思

種蓮子法三月清明以蓮子磨去頂上些
少盛水盞中浸子安置常受日光溫暖處
經日子發葉生根移以植盆當年着花植也塘中
最易旺浸水移盆時防鳥鴛來侵而可也泥用河泥

○奉次醉蓮韻

東郭

君家碧藕最稱奇乞核將期種小池待得他年花發

日醉看雲錦慰相思

○奉醉蓮

東郭

此來獨不得与足下相見或慮足下遠出問諸少
年即皆曰本不知也深心為訝矣此承投詩相問
副以珍饋良用感荷頃在江户足下寄一絕即十
疊其韻付諸芳洲門人矣未知傳致否耶乘閑一
訪是企別日此迫臨紙悵懷不備

○奉次醉蓮惠蓮子韻

鏡湖

團圓異實者來奇移自西天佛浴池種得小塘花發
後也應回首寄遙思

○謝奉醉蓮

鏡湖

來

世人之好古尚異者必曰此花移自某處此草從
某地見之与凡花小草同而無異狀何知其真贗
也今承足下所惠種其狀團圓縮硬大与世俗所
種者異此必仙種足下可謂信士而不虛好古者
也持歸種成未嘗不三嗅而思芳儀其有益於懷
想豈但草々贈語而已二磁尤感厚眷惟諒會也
○奉次醉蓮詞伯惠韻仍謝蓮子磁盃之贈

西竺蓮花異種奇寄來生色檻前池明年水閣清香
動紅藕看時起遠思

龍湖

一雙磁器絲花奇貯得文房傍硯池多謝故人珍重
意酌來芳醕每相思

此別更無再晤之期而竟孤一晤不勝悵惘

○奉次謝醉蓮詞伯贈天竺蓮子兼獻別意

南泛叟

異邦蓮子得之奇分与行人種小池他日可忘投贈
意每當花發共君思

昨

同

枉陋止病未得奉話追歎曷喻惠書画杯依受蓮
的銘念至此尤用感謝錦谷書四丈寬呈領情如

何

○奉贈東郭鏡湖龍湖泛叟四公

醉蓮

多謝高吟客舍中策歸程限近春風奈何相遇又相
別何日一樽重与同

臨別不堪繾綣之情勿忙之中不能覩縷伏冀亮
察

○奉呈李學士詞業

人見友竹齋樂義

使星持節海西來鰲域英雄專對才堪愧鷓鴣有高
志雲間直上鳳凰臺

○走奉呈洪鏡湖詞案

樂義齋

曾作雞林五鳳樓。浪花九月繫蘭舟。金鑾殿閣辭來後。震懾扶桑幾十州。

○謹次樂義齋高韻

洪鏡湖

海外秋晴古寺樓。垂虹橋下繫行舟。滿堂詩侶投瓊什。不讓蘇州與柳州。

○舟車萬里艱險多。狀時維秋涼。脩途無恙。文

旆抵此始得接。鳳儀感豁無涯。謾不量。撫陋。飲

綴下里一章以呈

東郭李公詞案痛賜繩墨

辛卯季秋

蘭洲北尾芳安拜稿

使節遙通東海天。星槎到處慶雲鮮。等閑逢着異鄉客。疑對蓬萊洞裏仙。

○奉次蘭洲韻

李東郭

小樓孤照近諸天。路入曹溪霽色鮮。自是滄洲連紫府。羽衣時復會真仙。

叨獻巴歌謬賜白雪井蛙之喜出于外矣再

疊原韻奉

東郭李公案右伏希介正蘭洲

椽筆雄詞氣拂天綺筵驚見彩虹鮮海東方里乘鯨
客更憶當時李謫仙

○奉次蘭洲

東郭

滿江風露正秋天題罷新詩思愈鮮採藥蓬山非我
志願狂甘作飲中仙

謹綴蕪詞奉呈

龍湖嚴公詩壇伏乞雌黃蘭洲

文旆遠從君子鄉殊方早聽令名香偶然相遇風流
事先問詩家古錦囊

○奉次北蘭洲韻

龍湖

秋光晚晚水雲鄉海岸千林橘柚香
話不須驢背掛詩囊

○再用前韻奉呈龍湖嚴公蘭洲

仙槎暫駐白雲鄉便覺高堂蘭蕙香
李故教風月滿行囊

○和蘭洲再疊韻

龍湖

客裏何妨入醉鄉強將樽酒汎秋香
吟哦贏得千篇

富已滿詩翁斗大囊

○敬奉呈鏡湖洪公詞案

蘭洲

風旆悠悠浪速涯更欣雅會在明時清談雖異兩邦語不隔神交托野詩

○奉和蘭洲

鏡湖

漢槎秋日繫湖涯正是江城橘柚時隨處驂壇知己在客窓連榻細論詩

再攀原韻奉呈鏡湖洪公

蘭洲

日夜遙憶天一涯仙舟遠到鴈來時綺筵邂逅論交處唱和須吟百首詩

○奉呈李東郭洪鏡湖嚴龍湖南泛叟諸詞伯

案下

橫井安節

号益睡

錦帆萬里海門幾重辭綠陰于貴邦至黃菊于

日域脩途無恙誠兩邦之慶也動定清福萬幸

至祝雖分隔雲泥欽仰高儀有日矣今依芳洲

好介接龍光宿志欽慕之願永釋矣奉呈早詩

一篇案下垂鴻慈賜郢削僕一生之榮豈加之

哉水兢

萬里滄瀛浮錦旌日東草木也知名何圖幸許龍門接茅塞頓開慕蘭情

○敬和益睡瓊韻

鏡湖

秋風滄海逐三旌，愧乏平生一藝名。多謝高朋先枉駕，新知莫惜話新情。

○奉次益睡詞伯辱示韻

龍湖

江城秋日駐龍旌，幙府文章愧刻名。幸有詩翁勤左顧，一床清話罄歡情。

○奉次益睡詞伯示韻

泛叟

蓬山處々駐行旌，幾許逢人問姓名。一吐襟懷親似舊，仙人亦有世人情。

○辱賜尊和謬蒙寵榮實出于意表矣再依前韻

奉呈謝

諸詞伯案下

益睡

光風霽月映文旌，沉愛慈容俱擅名。溫潤玉堂瓊樹下，一時化德拂卑情。

○再酬益睡韻

鏡湖

聯臨詩壘抗高旌，人與仙區共擅名。我唱君酬聊永夕，異鄉新契亦多情。

○再次益睡韻

龍湖

詩壇白戰插高旌，陣馬風檣舊擅名。兩國交隣修信好，等閑文士亦多情。

○奉呈李東郭洪鏡湖嚴龍湖南泛叟諸詞伯

案下

星槎萬里入靖洲先駐蘭橈浪速頭朝野改觀旌旆
麗江風自是奏千秋

○同酬及肩華韻

鏡湖

萬家城郭枕長洲形勝河山地盡頭最是名區饒物
色蒲林香橘擁殘秋

○奉次及肩詞客韻

龍湖

禪樓迢遞俯滄洲客棹初停大海頭賴遇詩朋拚勝
會一庭蕭瑟碧梧秋

○奉次及肩詞伯韻

泛叟

清霜一夜落蘋洲蕭瑟他鄉易白頭赤橘黃柑君可
好羈心殊異故園秋

○為小子及肩賜芳和於僕豈不感戴 思榮哉

代小子再步前韻奉呈 諸詞伯案下謹謝

益睡

見盡神山與寶洲陽春口角發毫頭勿言異域乏風
月黃菊迎君占晚秋

李東郭有事辭讓而入故無和

○奉贈三韓東郭李公

齋藤雅儔

德星爛々聚天邊果觀使君車馬鮮三島十洲經歷

處詩囊收得幾多篇

○奉次齋藤惠韻

李東郭

星槎再繫浪華邊。蒲路風霜兩鬢鮮。客榻紛紛多語。一場未見似君篇。

○奉寄東郭李公

稻津甘泉

四傑文章動十洲。王楊盧駱是同儔。料知萬頃鴨江水。瀉作明珠在筆頭。

○和稻津詞伯韻

李東郭

落日殘霞映遠洲。寺樓團會趁仙儔。羈愁別恨僚人意。未涉風濤已白頭。

○奉寄李東郭先生

渥生尹時十二歲

萬里西風好。帆飛落海頭。有才逢聖世。無恙到蜻洲。旌旆皆爭望。文章共要求。吾儔真可笑。俚句為聊投。

○奉次渥生秀才

東郭

清秋孤寺裏。落日大江頭。客棹迷三島。仙區近十洲。玉程無日限。靈藥恐難求。且須記名字。題詩向爾投。

○奉呈東郭李先生

入江若水

不識何時發。金山星槎九月到。人間幾朝阻。雨青藍。島連日。台風赤馬關。魚菜市開行。處泊鮎尊鄉。遠夢中。還野生難得。登龍路。只獻蕪詞。要笑顏。

奉謝若水詞伯用瓊韻却寄 李東郭

行人前日發萊山。九月歸舟南斗間。撲地村閭經大府。接雲樓櫓歷重關。烹茶古寺終朝醉。理楫煙波入夜還。咫尺仙居違勝覲。何時對榻一開顏。

○再用前韻奉酬東郭先生 若水

士望堂々比斗山。儒豪独占藝林間。雞窓遍讀古今史。鼇禁早抽名利關。階下花磚日高入。宮中蓮燭夜深還。客亭寄我新詩好。試欲賡酬只汗顏。

○以金絲烟寄贈東郭先生 若水

採得頭黃已去筋。割成金縷一何芬。面前乍起紛紛

霧。舌鏘徐生曳々雲。非酒能消詩客恨。代茶好賦睡魔軍。多情誰喚相思草。寄与征人把管薰。

○次謝富田惠南草 東郭

只取流津忌逆筋。到來輕縷却生芬。燃時愛吐罪々霧。吸處如吞裊々雲。偏合異鄉無夢客。最宜寒夜踐更軍。慇懃盛貺將何報。蘭室交情感襲薰。

○奉寄洪鏡湖 若水

一天雲霧隔鄉山。還海飄津數月間。燦々文星輝絕域。熒々紫氣溢重關。壯心豈碍棄縑太。雄辯何難完璧還。佳句驚人入四傑。玉揚盧駱更無顏。

○奉和若水詞案

鏡湖

形勝名都枕海山。萬家烟樹水雲間。蒼茫鄉國連天遠。寥落禪扉盡日關。賴有良朋隨處會。不知遊子幾時還。何來詩句多新響。盪手高吟洗旅顏。

○奉呈嚴龍湖

若水

故國迢々山上山。使星先入博桑間。海西繫楫三千里。江左乘輶百二關。秋後方逢文旆過。臘前要着錦衣還。不知明日何邊別。誰唱驪歌慰旅顏。

○和若水韻

龍湖

青丘萬里隔鄉山。極目雲濤浩淼間。已遣孤舟維海

岸。却隨征旆向江關。殊方節序清秋盡。遠客行裝幾日還。賴為君詩能起我。朗吟如對好容顏。

○奉寄南泛叟

若水

兩邦親睦重如山。遠艤樓舟溪水間。七八月中漂海島。五千里外向京關。官亭不忍牽衣別。驛路且期持節還。莫吝多囊珠一顆。佗時更好作容顏。

○和若水韻

南泛叟

客行多滯海中山。玄圃滄洲咫尺間。夜雨淒淒聞鼓角。雲天杳杳隔鄉關。星遙北極愁瞻望。路瀾東城計往還。誰把瓊瑤投旅榻。吟來恍若對清顏。

○奉呈朝鮮國諸名公

戶田方弼

雲水悠悠霽景開。乘時正好問蓬萊。仰瞻兩域修盟使。知是三都作賦才。辭國已逢重九過。論程能歷幾多來。燕詞安得供君笑。豈及句中敲与推。

○奉次戶田詞伯韻

李東郭

雄心牢落苦難開。憐君低頭在草萊。天下即今無好士。海東終古有奇才。一盃倘許瓊漿飲。萬里遙隨玉節來。醉後頭狂餘舊習。玉山何必待人推。

○和奉戶田詞郎

洪鏡湖

獨上高樓海色開。浮雲萬里望東萊。知君素有屠龍節。

藝顧我元非倚馬才。詩句漫憑愁外得。鄉山頻入夢中來。遵街為見湖天月。向夜禪扉手自推。

○奉和戶田寄示韻

嚴龍湖

異域奇觀眼目開。何須西東卧蒿萊。名都自是繁華地。藝苑偏多卓犖才。聯榻日看佳士至。遞筒時寄好詩來。清宵旅館無人到。誰向禪扉月下推。

○奉呈鏡湖洪先生詞案

山文菴

凌暑經寒客路遲。華輶待得向歸期。瓊筵堪喜還堪恨。始對仙顏即別時。

右持小詩過對州之儒臣雨森氏旅館而述學士

局會面之懇望雨森云歸帆無日學局忽々敢不能見若有暇隙傳達一章因附野章去有數日而和答自河口舟中來故數語及其事

○次奉文菴詞伯

洪鏡湖

風波日夕舉帆遲一別河橋杳後期莫道送人無可贈前村正好臘梅時

○寄東郭詞宗并序

大雄

先讀腹中文字五千卷醉裏豪情三百盃句謂唐家青蓮居士再世者乎又云胸懷坦蕩無畦畛於茲知其大度謾作小詩欲代會晤幸賜瓊琚何啻山林之榮耶千歲奇遇亦有成美
豪情快活李郎君千載青蓮今有聞滿口大言知具眼裴張直是逐雞群

○奉次大雄禪師寄示韻東郭

道家衣鉢屬吾君雪竇高風已飽聞莫說歸人方得音海門煙雨遠離群

空江雨雪客意悄々無歡緒方有懷人不見之歎
此際遠承情訊兼有瓊琚之惠詩中盛獎雖不
敢當而感荷則多矣走次惠韻以寓眷係之私

○肅上

東郭國子先生旅館下以供映堂冀得尺璧永為

家珍

玄圭

懿德有降於緝熙奉來玉節入丹墀浦珠含月文司
浦池柳回春太液池萬里長風名賦搏十洲多景錦
囊披禪餘何幸參詞伯勿吝雌黃出口皮

○奉次玄圭禪伯寄示韻

東郭

仙區民物自熙々更聽雲璈奏玉墀天上高懸新日
月海中初接舊城池禪家妙法逢僧詰賓館孤懷對
容披最愛吾師多道氣百年交契太毛皮

○奉呈朝鮮國製述官東郭李公館下

高野山興山泐嗣坂北大聖山不動密寺閑
居阿遮黎彥岑和南稿具

吳札觀光中州其美也千載傳焉今公高蹈滄
海直援扶桑之條遐邇望風而流芳聲於季代
也豈不美哉緇林菲才不忍緘默切呈野詩三章
聊表致賀之意切望幸賜高和傳以為珍寶具

不腆聊擬芹悃冀留

之一

方域何論西又東。一雙日月照青空。雞林禮樂無分古。鼇背山河有始終。自起瑜伽三昧座。故推光範萬年功。片言欲寄情難寫。帆影唯憐杏伴鴻。

之二

浮漚海外渺雲烟。值遇而今可感緣。通信有時隣國好。當仁無讓使臣賢。要觀神統百王化。應認靈區三島天。不老還丹若求我。從公一嘗直登仙。

之三

重命輕身渡海潮。風波萬疊思迢迢。我邦山水入君賦。安穩歸家早奏朝。

○奉次彦岑大師惠韻

東郭

之一

西來竺教遍天東。韻士高人說說空。萬物有形方有色。衆生無始亦無終。真詮盡入冥觀悟。慈筏爭推普濟功。膜外浮名拋已久。笑看雲際一飛鴻。

之二

南遊剎得賞風烟。應有名區未了緣。錫杖相尋多韻釋。瓊篇迭唱荷諸賢。無窮富嶽山前路。不盡扶桑樹

外天詠罷清詞心更遠十洲何必訪真仙

之三

一片仙槎萬里潮故園歸路尚迢迢吾行不是耽遊
賞採得風謠奏聖朝

○野章一首寅呈鏡湖洪詞伯案下供祭肅乞莫
借高批附以菲儀冀叱存焉

指日望風入馬臺五雲深處是蓬萊而吟誰比避秦
客為國萬年獻壽來

○野律一章別呈洪嚴南三詞伯案下充祭
終古海潮信不違天時人事道惟微鷁舟萬里銜君

命龍旆百城掠日輝草木文章推物化雲霞錦繡在
吾非自探囊底無為贈只喜蓬萊採藥歸

○奉次彥岑大師惠贈奉道案 洪鏡湖

梵貝曾聞秘漢臺大乘今得住蓬萊能翻寶偈題離
恨麗藻應從惠貫來

○又次惠長律

歲律將窮歸計違海城烟靄晚罪微來傳一幅瓊瑤
字帶得高禪水月輝漠々雲山三界淨悠々塵世萬
緣非慙懃情贖多珍翫不見其人悵惘歸

○鄙絕一篇叨呈龍湖嚴詞宗梧右博笑祗請莫

各清和附以菲儀冀亮留之 彦岑
那厭曠途多少難。臣忠不墜廟堂謨。君今入海莫空
手。任得驪龍領下珠。

○奉次彦岑大師辱贈韻 嚴龍湖

佛家用力乘津筏。書圃留心飲訓謨。孤負靈山聽玄
訣。濁浪安得照尼珠。

○又次惠長律

歸計差池與願違。涉艱寧復見幾微。忽蒙佳什瓊瑤
惠。如觀清襟水鏡輝。梵貝真詮心竊慕。道場良晤計
全非。深情獨對閣黎吐。惆悵今朝送爾歸。

○野詩一章猥呈。泛叟南詞伯。机下敢擬軒渠實
祈幸。貺清和附以輜儀冀笑入之 彦岑

南閣西曜一洲濱。粟散曾觀海又隣。方外來親君莫
怪。為賓為主我知因。

○奉次彦岑大師寄示韻 南泛叟

大聖山高大海濱。滄洲玄圃接為隣。仙標自與塵蹤
隔。欲往從之未有因。

○呈朝鮮國製述官東郭李君閣下謹請示諭

問 彦岑

一青丘是朝鮮國別名耶或曰新羅別名也謹諭之
一李唐之世密教流傳貴國中華書集所記甚明著
矣不知至今盛行於貴國耶且有密教耆傑能樹
法幢者耶密教闡揚之場或山或寺又幾處耶謹
祈示之

副啓

我國昔日弘法大師入唐幸受密教於東都青龍
和尚來而其法始大弘通邦域而卒奉為國家
奏諸朝以置內道場於宮禁結壇修法恭祈
皇圖無疆四海昇平觀其密軌太嚴重矣爾來幾乎

千年而見諦密流奉旨相承修之每歲于今不
廢也且夫邦域之內名山鉅刹多是鼻祖大師開
天其法綿々繩々焉凡自王侯以還至于萬庶無
一而不崇奉此法也蓋夫毘盧遮那此翻大日毘
盧大教東漸佛日遍照大日本國與天照皇太
神輝覆護國祚於萬萬世可謂不可思議也密
宗真言宗瑜伽宗陀羅尼宗曼陀羅宗其言異其
義一耳此乃如來自內證三摩地法門而為一切
衆生即身成佛之直道也

卷

新羅之別號也
跡論謹悉而我大東於禹貢為青州故曰青丘非

我大東自箕聖以後專尚儒教斥佛家甚嚴新羅
高麗之末頗崇信尊奉而入我聖朝群儒輩出
倡明吾道則釋教之不行固也是以儒自儒佛自
佛學西教者就窮山深谷中設道場誨徒衆者不
無其人而清虛堂休靜芙蓉堂惟政若而人外不
過誦經攻詩之徒而已矣

真言宗禪宗多有之而某寺有某寺無未知之耳

貼

今承

尊師辱賜瓊什且有各種贖行之物自顧不佞何
心獲此感謝僕不知喻高韻即當和呈而自去
夜粹得寒疾方伏枕叫苦稍俟病間謹當和呈此
意告達于尊師如何

龍湖拜

惠來別幅拜受攢謝無已卻之為不恭茲敢留之
而於心不安無心為喻

龍湖

惠送各種依錄領受珍謝萬々物其不此第切未
安朝鮮紙一束汗呈
領情如何
泛叟

○奉呈鏡湖洪先生案下

榮儀 別號忍教

星槎遠逐碧溟浮仰望天涯紫氣流賴是群仙拚勝
會賦詩此日兩心投

○酬贈忍教長老禪案

鏡湖

縹緲仙樓勢欲浮長河浩蕩繞城流慙慙法侶遺瓊
韻還似明珠暗裏投

○奉呈東郭李公吟案下

寂順 別號又玄

海山千里脩途無恙 文旗到此恭喜萬々因不
顧俚語聊述鄙懷伏乞 介正

萬里滄瀛彩舸浮 文林高客到吾州何圖此日見君
子忽洗塵心成勝遊

○次又玄上人韻

東郭

半羊蹤跡似萍浮今日行裝又浪州見說招提多勝
槩撥忙安得與師遊

○再賡前韻奉呈東郭李公案下

寂順

梅香文氣孰先浮。名譽已馳六十州。二八驪珠擊得
了。更歡與子結清遊。

○奉次又玄法師韻

鏡湖

城壓滄瀛勢欲浮。繁華形勝擅雄州。上人亦有敲推
興。攀得賓筵半日遊。

○奉次又玄上人道案

龍湖

慈海茫茫寶筏浮。古來東勝是神州。今朝喜托空門
契。方外欣成法界遊。

○奉次又玄上人韻

泛叟

山似飛々地似浮。海中佳麗惣仙州。忽々萬里偷閑

際。竹院仍成半日遊。

○四明君辱賜高和復賦一絕奉謝

寂順

延佇仙槎到攝津。相逢只耻我詩貧。風流文采曜桑
域。筆下生花冬又春。

問

寂順

禪月集有棧深黃杭小之句。棧字為何訓。

答

棧與椽一木也。

東郭鏡湖龍湖泛叟四公相議良久。囑譯者雨森氏乃把筆書如此。

○奉呈東郭李公旅館下

慧明

簫鼓清莊韓樂音。青旗彩鷁日邊臨。幾回斷續鴻臚夢。江畔梅開朔雪深。

外附煙草十束

○次寄慧大師道案

東郭

殊向禪宮聽梵音。夢中螺黛費登臨。紫莖靈草華牋字。珍重心情海水深。

○席上走呈眼上人道案

東郭

佛浴正東漸。禪心已北天。杖頭常擊竹。鉢裏又生蓮。筆力欺懷素。詩豪歷謫仙。匆匆今別去。不覺淚潸然。

○卒奉次東郭李先生高韻

幽霞窟瑞眼

蕭條東海路。迢遞朔風天。庭上飄紅葉。社中生白蓮。蓬州間日月。闌苑小神仙。不假練磨力。詩成任自然。

○過清見寺呈芝岸和尚猊右

俯乞正

前往相國

賜紫沙門別宗祖緣拜稿

登臨清見寺。眼界水雲寬。美保銀波激。富慈白雪寒。床頭橫柳標。定裏燒梅檀。知是異邦客。到茲可改觀。

○呈朝鮮諸公

自靜津大拙稿

兩邦交好幾千秋。萬里滄溟艤客舟。九夏闌時辭鯨域。重陽過處到蜻洲。牙檣影外羽旗閃。玉笛聲中錦纜柔。休笑山僧還好事。袖詩今日識荊州。

○奉和_レ大拙上人惠韻

嚴龍湖

客懷慘慄易驚秋。黃橘丹楓映彩舟。瀛海波濤連大陸。名都闐闐簇長洲。銷愁每引_レ盃心凸。得句時憑_レ筆舌柔。多荷禪翁勤遠訪。夕陽飛錫自_レ河州。

○呈鏡湖書記

大拙

菊花正發海東秋。韓使乘槎萬里遊。到處騷壇揮健筆。清詩妙絕有誰酬。

○和呈大拙道案

鏡湖

仙界香飄橘柚秋。滄波萬里漢槎遊。應真飛錫來相過。妙絕清詩不敢酬。

○再次_レ呈鏡湖書記

大拙

山中癡隱度春秋。難做文溪漢水遊。今也奇哉星使到。津亭賦句共賡酬。

○呈李學士

同

桂枝早向月中攀。製述名高兩國間。才比謫仙誰可敵。文齊司馬自同班。二千餘里逾鯨海。五十三亭遇_レ士山。歷盡殊方詩幾首。直須收拾錦囊還。

○奉次自靜大師韻

東郭

咫尺扶桑手可攀。一秋行李十洲間。東溟勝槩供新興。北闕微官輟舊班。域內繁華惟此地。望中蒼翠是

何山它時欲向招提宿。須計郵程待我還。

○用前韻寄洪書記

自靜山人

禪子隱栖誰敢攀。絲來占斷白雲間。惟叅嵩少室中
旨。不夢率陀宮裡班。數圃種蔬鋤後苑。一盃斟茗對
前山。停槎如得徼徐福。塵外結交共往還。

○和奉自靜大師道案

洪鏡湖

芝眉何幸客中攀。好是金沙淨界間。意氣從知秘演
輩。詩篇堪與惠休班。樓臺夜色涵湖岸。橘柚秋香滿
海山。他日重逢猶可約。我行當趁臘前還。

○用前韻寄南泛叟書記

大拙

南公風采未曾攀。聞說三韓四傑間。李杜蘇黃疑並
世。揚王盧駱訝同班。來乘海上千層浪。行見江東萬
里山。今向武城修舊好。寧看他日錦衣還。

○和寄大拙上人道案

龍湖

道人清範許曾攀。數日睽違咫尺間。愁裡每驚滄海
月。夢中時逐紫宸班。身隨彩鷁窮桑域。眼看長鯨噴
雪山。珍重新詩多厚意。報瓊慚愧木瓜還。

○謝嚴書記和寄兼送諸公赴東武

大拙

白雪調高不可攀。文光直射斗牛間。三津今見詩壇

將百濟元稱玉笋班。華館應勞君彩筆。鮫珠寄與我
青山重逢喜有臘前約。千里東關須早還。

○奉送東郭學士歸朝鮮 大拙

一片雲帆萬里天。來風破浪返朝鮮。君王若問扶桑
事。正好開囊獻錦篇。

○奉次大拙上人韻 東郭

海雲山雪正寒天。靜界蕭條晚景鮮。旧約不違成再
會。高僧時復有新篇。

○奉送鏡湖書記返朝鮮 大拙

文旆曾行東武時。詩篇寄我約歸期。坂城此日重逢

處。便是今生永別離。

○奉次大拙詞案 鏡湖

海門窮臘雪飛時。去日曾留此日期。一別悠悠難再
會。渡頭携手惜分離。

○奉送龍湖書記歸朝鮮 大拙

歲晚江頭送客船。滿天飛雪別淒然。想應中路春風
起。鄉國歸時社燕前。

○奉次大拙上人別詩韻 龍湖

滄洲已艤木蘭船。一夜歸心正浩然。多謝高禪來送
別。道儀重對客牕前。

臨別卒賦呈諸公

兩森氏禁律詩故
除對句用成絕

大拙

寒梅香當酒送別浪華邊屢望唐冠服時聞韓管絃
客舟人五百鄉國路三千歸去如回首月升東海天

○奉次大拙再示韻

東郭

積雪長亭外深冬大海邊永嘉臺上月應照浪華天

○次奉大拙再韻

鏡湖

臘月江梅動寒雲古堞邊臨岐無語別滄海遠連天

○寄南書記

大拙

萬里東來留半年浪華今促錦帆旋與君不得一相

會此世永違支許緣

○奉次大拙上人示韻

泛叟

千里驅馳日似年客程扶病強言旋明朝碧海歸帆
促恨負賓筵一會緣

○重用前韻寄李學士

大拙

庖眉華館西回攀交恰不論儒釋間漢水元通桑水
澣文星今入使星班八磚聲價欺程性千首新詩推
義山聞說仙舟停此地俚篇又寄送君還

○又寄洪書記

大拙

高人一別絕追攀遙望暮天雲樹間拙句慚非齊已

輦賢才應與鄭公班錦帆此日辭津水文旆何時返
金山使者榮踰完趙璧相如往昔誰秦還

○又寄嚴書記

同

萬里三韓難往攀佛經曾送日東間凌空慚之應真
錫秦使爭追彌老班採藥人皆登白嶺尋僧誰自到
金山相逢欲問勝遊處無那星槎此去還

兩東唱和錄卷下終

